

CONVOCATORIA PA LA ESCOYETA DE PROPUESTES D'ESPECTÁCULOS FAMILIARES Y ESCOLARES DE MÚSICA Y D'ARTES ESCÉNIQUES Y DE TALLERES ESCOLARES DIRIXÍOS A CENTROS EDUCATIVOS DEL PRINCIPÁU D'ASTURIES PA LA SO PROGRAMACIÓN POSTERIOR EN LLABORAL CIUDÁ DE LA CULTURA

EL PROYECTO

La Sociedá Pública de Xestión y Promoción Turística y Cultural del Principáu d'Asturies (d'equí p'alantre, la SPXP) tien encomendada la xestión de dellos equipamientos culturales, turísticos y deportivos de la rexón, ente ellos Llaboral Ciudadá de la Cultura en Xixón.

Dende Llaboral, ufiértase una programación recurrente y variada pa toa clas de públicu (adulto, familiar, escolar, etc.), tanto d'espectáculos musicales como d'artes escéniques, ente otros disciplines; amás, ufierta un programa d'actividaes pa escolares como alternativa fuera del aula a los centros educativos de tola rexón, ente otros proyectos, talleres didácticos que se lleven a cabu nes distintes instalaciones de la Llaboral.

Tanto les artes escéniques como la música son un productu cultural y una manifestación artística qu'ayuden al desenvolvimientu económicu, la creación d'emplegu y el caltenimientu de la diversidá cultural y, por eso, ye una de les manifestaciones culturales propuestes pa la programación familiar y escolar de Llaboral Ciudadá de la Cultura, colo que se quier, amás, xenerar una ufierta artística diversa y de calidá, fomentar el desenvolvimientu de los vezos y el consumu culturales ente públicu vario na so contorna más averada y dar a conocer la diversidá de xéneros y formatos artísticos.

La realización de los talleres escolares busca un oxetivu doble: per un sitiu, dar a conocer el trabayu de profesionales d'ambitos variaos como la ciencia, la historia, la lliteratura, arquitectura, l'arte, etc., y per otru averar al alumnáu de la rexón una programación d'actividaes didáctiques de calidá que puedan valir como complementu a los conteníos impartíos nel aula.

Basándose no espuesto, la SPXP promueve una convocatoria pa escoyer espectáculos de delles disciplines d'artes escéniques (teatru, danza, circu, maxa y teatru d'oxetos y títeres), amás de proyectos musicales interpretaos por bandes y/o solistes musicales, y talleres escolares de delles tipoloxíes promovíos por profesionales d'ambitos variaos. A partir de la escoyeta, va conformase un rexistru d'espectáculos diversu y representativu del máximu númberu posible de disciplines de les artes escéniques y la música, que va valir pa facer la programación familiar y escolar de Llaboral Ciudadá de la Cultura pal cursu 2026-2027, amás d'un rexistru de talleres prácticos variaos de delles disciplines pa completar el programa escolar 2026-2027.

La sede que va acoyer les actividaes oxetu d'esta convocatoria ye Llaboral Ciudá de la Cultura (Xixón), poniendo a disposición de los/les profesionales interesaos/es nesti proyectu tanto'l Teatru o Parainfu (nel casu d'espectáculos) como delles sales (nel casu de los talleres), que se van escoyer en función de los requisitos del espectáculu/taller presentáu y de la disponibilidad del espaciu pa cada fecha.

Tolos espacios propuestos han cumplir la llexislación vixente en materia de seguranza y la referida a prevención de riesgos llaborales.

1.- OXETU DE LA CONVOCATORIA

L'oxetu d'esta convocatoria ye escoyer proyectos artísticos de música y artes escéniques, amás de proyectos varios de talleres escolares pa programar depués en Llaboral Ciudá de la Cultura dientro del programa VAMOS! 2026-2027.

Los talleres escolares han celebrase con reserva previa de los centros educativos, en feches a acordar ente Llaboral y los/es profesionales seleccionaos/es.

Con esta convocatoria establécense les bases y requisitos que van rexila, amás del procedimientu pa escoyer los espectáculos y talleres que van integrar esta llista con respetu a los principios de publicidá, llibre concurrencia y oxetividá.

2.- PUBLICACIÓN Y PUBLICIDÁ

Esta convocatoria y bases, amás de la resolución del procedimientu, van publicase na páxina web de Llaboral Ciudá de la Cultura (laboralciudaddelacultura.com), ensin perxuiciu de los medios complementarios de difusión que la SPXP considere afayadizo usar.

3.- SOLICITANTES

Van poder participar nesta convocatoria les persones físiques o xurídiques que cumplan estos requisitos:

- Desenvolver la so actividá principal n'ámbitu de la investigación o programación d'actividaes culturales, didáctiques, educatives y artístiques.
- Atopase al corriente de les sos obligaciones tributaries col Estáu y cola comunidá autónoma del Principáu d'Asturies, amás de les obligaciones cola Seguridá Social.
- Tar daos d'alta na Seguridá Social y n'epígrafe correspondiente del Impuestu d'Actividaes Económiques y acreitar la solvencia técnica precisada primero d'empezar les actividaes nel casu de que'l proyectu resulte escoyíu.

- Les persones que lleven a cabu l'actividá y tean en contactu colos grupos infantiles han presentar el Certificáu de Delitos de Naturaleza Sexual de forma previa a la realización de l'actividá.

Esta documentación ha presentase **cuando se notifique que'l proyectu resultó escoyíu** y primero d'empezar les actividaes.

4.- CARACTERÍSTIQUES DE LOS PROYECTOS QUE PUEDEN PARTICIPAR NESTA CONVOCATORIA

Les característiques qu'han cumplir les propuestas son estes:

XÉNERU:

- Espectáculos: pueden presentase a esta convocatoria espectáculos d'estes manifestaciones artístiques: música, teatru, danza, circu, maxa, teatru d'oxetos y títeres y de formatos, estilos y públicu oxetivu variaos.
- Talleres: los proyectos van poder tratar sobre cualesquier disciplina o temática con vinculación a los conteníos educativos impartíos nos centros escolares: lliteratura, astronomía, matemátiques, nueves tecnoloxíes, ciencia, arte, historia, naturaleza, bioloxía, mediu ambiente, arquitectura, idiomas, etc.

PÚBLICU OXETIVU:

- Nel casu d'espectáculos: familiar, xuvenil y alumnáu de los distintos ciclos d'Infantil / Primaria / Secundaria.
- Nel casu de los talleres escolares: alumnáu de los distintos ciclos d'Infantil / Primaria / Secundaria.

LLINGUA: van aceptase proyectos d'actividá en castellanu, asturianu y eonaviegu (gallego-asturianu), inglés y francés.

NÚMERO DE PROYECTOS POR PROFESIONAL O ENTIDAD: el númberu final de proyectos que se contraten va determinase pol presupuestu máximu disponible. El máximu de propuestas pa participar nesta convocatoria por profesional o entidá ye de **2** proyectos nel casu de los espectáculos y **5** nel casu de los talleres escolares.

MEDIOS TÉCNICOS Y HUMANOS: cada profesional o entidá ha poner los medios técnicos (de los que nun disponga la sede) y humanos (músicos/ques, actores, actrices, personal técnico...) que seyan menester pa la representación/conciertu/actividá, amás de los materiales funxibles en casu de necesitalos (talleres escolares).

TEMPORALIDAD Y FECHAS: les actividaes van programase a lo llargo del próximu cursu escolar 2026-27, en feches a acordar ente dambes partes na xornada lectiva (de llunes a vienres n'horariu de pela mañana) nel casu de los talleres y funciones escolares y, en domingu en casu de les funciones familiares.

Nel casu de los talleres escolares, en siendo comunicaes y espublizaes ente los centros escolares la programación y feches, va dase un plazu de reserva d'hasta 7 díes enantes de la fecha d'execución prevista de l'actividá. En casu de nun producirse nenguna reserva por parte de los centros educativos, el taller va anulase ensin qu'haya llugar a contraprestación económica dalguna. En casu de mutuü alcuertu ente les partes, tamién se podrá intentar buscar una fecha alternativa p'aplazar l'actividá.

PRESUPUESTU MÁXIMU POR PROYECTU:

- Espectáculos. Establezse un preciu máximu por actividá pa participar nesta convocatoria de:
 - Función familiar: 2.500 € + IVA
 - Función familiar + función escolar al otru día depués de la función familiar: 4.000 € + IVA
- Talleres escolares. Establezse un preciu máximu por actividá pa participar nesta convocatoria de 500 € + IVA

DERECHOS D'EXHIBICIÓN: cada profesional o entidá ha tener los derechos de propiedá intelectual pa exhibir o mostrar el proyectu que proponga. La SPXP va correr colos gastos de derechos d'autor que se xeneren pola exhibición de los espectáculos que resulten escoyíos, d'alcuertu coles condiciones establecíes pola SGAE (Sociedá Xeneral d'Autores y Editores) o pola entidá xestora de los derechos mentaos.

5.- PRESENTACIÓN DE SOLICITÚES

Las solicitúes han presentase al traviés de la web <http://panel.asturiesculturaenrede.es>

Los interesaos/es van poder presentar proyectos d'espectáculos, de talleres escolares, o de dambos.

Documentación qu'ha presentase:

- 1º. Declaración responsable d'alguerdu col modelu establecíu n'ANEXU I.
- 2º. Dossier del proyectu (espectáculu/taller).
- 3º. Currículum del profesional o entidá que presenta'l proyectu.
- 4º. Descripción detallada de les necesidaes técniques (que nun ponga la entidá que participa na convocatoria), si fore menester.
- 5º. Semeya/es ilustrativa/es del proyectu.
- 6º. Enllaz a videu (nel casu d'espectáculos).
- 7º. Guía didáctica del espectáculu (si yá la tuviere).

La hora y fecha tope de presentación de les solicitúes van ser les **12:00 hores del día 29 de mayu del 2026**.

6.- VALORACIÓN DE LOS PROYECTOS, CATALOGACIÓN Y ESCOYETA

La valoración de los proyectos o propuestas presentaes va facese, d'alguerdu colos criterios fixaos nestes bases, dende l'área de Xestión d'Espacios de Llaboral Ciudá de la Cultura, integrada por:

- Lourdes Prendes García-Barrosa, xefa del Área de Xestión d'Espacios de Llaboral Ciudá de la Cultura.
- Silvia Álvarez Solís, técnica del Área de Xestión d'Espacios de Llaboral Ciudá de la Cultura.
- Verónica Ruíz Gutiérrez, técnica del Área de Xestión d'Espacios de Llaboral Ciudá de la Cultura.

Van poder pidise a los/es interesaos/es toles aclaraciones, información o documentación complementario que seya menester pa la valoración correcta de los proyectos.

La resolución va comunicase a los/es interesaos/es primero del 15 de xunetu del 2026, y va publicase na web de Llaboral (laboralciudaddelacultura.com).

Criterios de valoración. Van calificase les propuestas presentaes como “Escoyíos” y “Non escoyíos”, valorando que s'afaigan a estos criterios:

-Interés cultural y/o artísticu del proyectu. Van valorase sobre manera la calidá didáctica y calter novedosu del proyectu y va tenese en consideranza'l grau d'elaboración, detalle y concreción de la propuesta, amás de la so orixinalidá.

-Va tenese una consideranza especial con aquelles propuestas que fomenten la igualdá y la diversidá, qu'usen un llinguaxe inclusivu, que promuevan una mayor visibilidá de la muyer y/o que propongan discursos dende la identidá de xéneru.

- La formación, esperiencia y trayectoria de profesionales y entidaes implicaes nel desenvolvimientu de los proyectos.

-Viabilidá técnica, económica y rigor presupuestariu. L'adecuación del preciu al númeru de profesionales implicaos y los medios técnicos y materiales que s'apurran.

Desque valoraos tolos proyectos, va publicase un informe indicando qué espectáculos/talleres resultaron “Escoyíos” y “Non escoyíos”, elaborando un catálogu d'espectáculos y talleres escolares que van incorporase definitivamente na programación de Llaboral Ciudá de la Cultura pal cursu 2026-2027, y va contactase colos profesionales de los proyectos escoyíos pa cuadrar les feches de les actividaes.

7.- DOCUMENTACIÓN A PRESENTAR POLOS PROYECTOS ESCOYÍOS

Desque confirmada la selección y axudicación del proyectu, los escoyíos han presentar nel plazu requeríu esta documentación:

- a) Documentos qu'acréiten la personalidá del solicitante. Si'l solicitante fore persona xurídica, ha acreitase cola presentación de la escritura de constitución o modificación, si ye'l casu, inscrita correctamente nel Rexistru Mercantil cuando esti requisitu seya esixible según la llexislación mercantil aplicable. Si esti requisitu nun fore esixible, la capacidá d'obrar ha facese cola escritura o documentu de constitución, estatutos o acta fundacional, onde consten les normes poles que se regula la so actividá, inscritos, si ye'l casu, nel Rexistru Oficial correspondiente. Pa empresarios individuales y persones físiques, va ser obligatoria la presentación de la fotocopia del DNI o documentu que, nel so casu, lu sustituya reglamentariamente.
- b) Documentos qu'acréiten, si ye'l casu, la representación. Los que comparezan o firmen ufiertes en nome d'otru han presentar Documentu Nacional d'Identidá y poder. Esti poder ha figurar inscrite nel Rexistru Mercantil o, si ye'l casu, nel Rexistru Oficial correspondiente. Si se trata d'un poder p'actu concretu, nun ye menester la inscripción nel Rexistru Mercantil, d'alcuertu col artículu 94.5 del Reglamentu del Rexistru Mercantil.
- c) Acreitación d'atopase al corriente d'obligaciones tributaries y cola Seguridá Social:

- Impuestu sobre Actividaes Económiques: alta nun epígrafe relacionáu col oxetu de la convocatoria referida al exerciciu corriente, o últimu recibu, acompañáu d'una declaración de nun tar dau de baxa na matrícula del impuestu mentáu, o bien certificáu de situación al respective d'esti impuestu emitíu pola Axencia Tributaria.
- Certificación positiva acreitativa d'atopase al corriente de les obligaciones tributaries col Estáu emitida pola Axencia Estatal de l'Alministración Tributaria.
- Certificación positiva del Ente Públicu de Servicios Tributarios del Principáu d'Asturies acreitativa d'atopase al corriente de les obligaciones tributaries col Principáu d'Asturies.
- Certificación positiva d'atopase al corriente de les obligaciones cola Seguridá Social emitida pola Tesorería Xeneral de la Seguridá Social.

NOTA ACLARATORIA:

Nun van tener que presentar l'impuestu d'actividaes económiques aquellos proyectos escoyíos que tean nel supuestu d'exención del impuestu sobre'l valor añadiu que s'establez n'artículu 20. Ún. 26.º de la Llei 37/1992, de 28 d'avientu, del Impuestu sobre'l Valor Añadiu: «Los servicios profesionales, incluyíos aquellos con una contraprestación que consista en derechos d'autor, desenvueltos por artistes plásticos, escritores, collaboradores lliterarios, gráficos y fotográficos de periódicos y revistes, compositores musicales, autores d'obres teatrales y d'argumentu, adaptación, guión y diálogos de les obres audiovisuales, traductores y adaptadores».

Les solicitúes que, siendo propuestas pa facer el so proyectu, nun acreíten dentro del plazu establecíu'l cumplimientu de les obligaciones precisaes o nun presenten la documentación en plazu van poder escartase.

8.- FORMALIZACIÓN DE LOS CONTRATOS

Desque acreitaos los requisitos de participación, van formalizase los contratos correspondientes. El plazu pa la formalización d'estos contratos va depender de la fecha de realización de l'actividá, teniendo que formalizase siempre a lo menos 7 díes primero de la fecha cuando se tenga que desenvolver esta actividá. El pasu d'esi plazu ensin que llegue a formalizase'l contratu por causes imputables al solicitante va provocar la caducidá de la solicitú, la perda de los derechos que pudieren corresponde-y y la esclusión del so proyectu del catálogu de la programación de Llaboral.

9.- OBLIGACIONES DE LES ENTIDAES ESCOYÍES

Nel casu de resultar escoyida la so propuesta, los profesionales o entidaes comprométense a:

- Desenvolver el proyectu nes feches, hores y términos conveníos.
- Apurrir a la SPXP una guía didáctica del espectáculu pa facela llegar a los centros escolares primero de celebrar l'espectáculu
- Poner a disposición de la SPXP el material gráfico y audiovisual al so algame pa facilitar la promoción y difusión del eventu.
- Difundir al traviés de los sos medios información sobre l'actividá (web, redes sociales, *mailing*, etc.) y colaborar cola SPXP na atención a los medios de comunicación nel casu de que seya menester.
- Aceptar l'usu del nome del profesional, asociación y/o empresa p'acciones promocionales o de comunicación del proyectu.
- Presentar la documentación que resulte d'aplicación según la llexislación vixente en materia de seguridad llaboral y prevención de riesgos llaborales.

10. - ACEPTACIÓN DE LES BASES

La presentación d'un proyectu a esta convocatoria supón l'aceptación automática y completa d'estes bases.

ANEXU I

DECLARACIÓN RESPONSABLE

D./D.^acon NIF n.º.....
En nome propiu o en representación de la empresa
.....con NIF n.º en
calidá de

Tocante a la solicitú de participación na convocatoria pa escoyer propuestas pa la elaboración d'un catálogu d'actividaes didáctiques y lúdiques y programales depués n'equipamientos culturales y deportivos del Principáu d'Asturies **DECLARA BAXO LA SO RESPONSABILIDÁ** que:

1.- Ta en situación d'alta n'Impuestu d'Actividaes Económiques (IAE), baxo l'epígrafe
_____ correspondiente a _____.

2.- Nun incurre nes prohibiciones pa contratar previstes n'artículo 71 de la Llei 9/2017, de 8 de payares, de Contratos del Sector Públicu y atópase al corriente del cumplimientu de les obligaciones tributaries col Estáu y cola comunidá autónoma del Principáu d'Asturies y de les obligaciones cola Seguridá Social, impuestos poles disposiciones vixentes.

3.- Tien la titularidá de los derechos d'esplotación del proyectu que presenta a la convocatoria.

Y pa qu'asina conste y tenga efectos énte la Sociedá Pública de Xestión y Promoción Turística y Cultural del Principáu d'Asturies, SAU, firma esta solicitú y declaración responsable

En _____ a ____ de _____ del 2026

Fmo. _____

(firma del solicitante o representante llegal)

INFORMACIÓN BÁSICA SOBRE PROTECCIÓN DE DATOS	
Responsable	SOCIEDÁ PÚBLICA DE XESTIÓN Y PROMOCIÓN TURÍSTICA Y CULTURAL DEL PRINCIPÁU D'ASTURIES, S.A.U.
Finalidá	Participación na programación d'espectáculos familiares y escolares y de talleres escolares en Llaboral Ciudá de la Cultura dientro del programa VAMOS! 2026-2027.
Llexitimación	Consentimientu del interesáu.
Destinatarios	Los datos van poder usase pol personal adscrito a la SPXP.
Derechos	Acceder, correxir y suprimir los datos, amás d'otros derechos, como s'esplica na información adicional.
Información Adicional	Pue consultar la información adicional y detallada sobre Protección de Datos na nuestra páxina web: https://www.turismoasturias.es/aviso-legal